



Uqariyauyuq

Hivuliqti Akeeagok niriugiyaa hivuniquhaatigut naunaiqhimayait Uqaqtaannik Kuin Kivraqtianit

Nuvaippa 23, 2021
Iqaluit, Nunavut

Hivuliqti PJ Akeeagok ublumi tuhaqtitaa una uqauti:

“Tun’ngahuktittiu’nga hivuniquhaatigut naunaiqhimayait uqaqtainik Kuin Kivraqtianit Mary Simon. Nan’ngariyauyuq ubluq qan’ngaraalurmun puiguqtailiyaqhaq hadjamin Inuinnarnut Kanatami tuhaayaami hivulliqpaan’nguyuuq Kivraqtuipuni Kuinmut Kanatami Uqaqhugit Uqaqtaannik Inuktitukkuuqhuni. Hakugingniqaqpiqhunilu takuyaami Kuin Kivraqtin’nga uqaqtaa aullaqtigiplugu nalunaitkutigiumaplugu hulidjutiqhannik mamittiirnikkut.

Ilanggit hivulliutigiyauyuqhat naunaiqhimayait Uqaqtaannik uqaqhugit aqhuurutauyuqhat ihumagiyauyut Nunavunmi. Quviahuktun’nga tuhaagapku aqhuurutigiplugit hulidjutiqhannik mamittiirnirmun, ihumailiqinirmun, igluqhatigun, aulapkaidjutiqhanirmun akittuvallaangnaittumiklu munaqhinirmun nutaqqanik.

Hapkua naupkaidjutiqhat ikayuutauniaqtut uqaqhugit Nunavutip aulapkaidjutiqhait igluliqinikkutlu ihariangningatigut imaalu an’ngiyuamik ikayuutigiyauuniaqpiangniaqtuq nunavutim ayuqhautaa inminiirnikkut. Tun’ngaviugutauniaqtuqlu nakuuqpiqatmik nutaqqaptingnut.

Aadlattaug hivulliutigiyauyuqhaq naunaiqhimayaa Uqaqtaannik hilaup aadlangguqtirnia Ukiuqtaqtumi uunnahainnalirnia. Nunavut nan’ngariyaqatut qan’ngaraalurmin paatnaqatigiplugit Kavamatuqait uqaqvigiumaplugit hilaup aadlanguqtirninganut, havaaqhaitlu piliurniatigut Tallurutiup Imanga Kanatami Imarmiut Tammaqtailiplugit Imainni, Kanatap an’ngitqiat imarmiup munariyauyut imainni.

Nunapta havangniaqpiqhaimayait tammaqtailiplugit kahaqhimaittut Ukiuqtaqtumi avatiliqidjutikkut huradhatlu nayugait pidjutillutik piviqhaqatitiplugit Nunavunmiut maniliurnirmutigut imarmiutigut maniliurutiqhaitigut havaarittiagutauyuqhatigunlu.

